

Održana javna rasprava o Centru za upravljanje otpadom u Konjicu

20 March 2012

U Konjicu je dana 15.03.2012. godine održana Javna rasprava o Zahtjevu za izdavanje okolinske dozvole za Centar za upravljanje otpadom (CUO), a čija izgradnja je planirana na području Repovačkog potoka u općini Konjic. Raspravu su vodili predstavnici nadležnog Ministarstva trgovine, turizma i zaštite okoliša HNK. Pored njih skupu su prisustvovali i predstavnici konsultantske kuće Zagrebinspekt, koji su izradili Zahtjev za izdavanje Okolinske dozvole za CUO, te predstavnici općinskih vlasti.

Ovoj javnoj raspravi, od strane predstavnika civilnog društva, prisustvovali su članovi udruženja Zeleni Neretva, te predstavnici Organizacije sportskih ribolovaca i Volontera grada Konjica. Nažalost, ovoj raspravi nije prisustvovao niti jedan građanin iako je rasprava (kao i tema rasprave) blagovremeno najavljivana i eksponirana od strane sredstava javnog informisanja.

Na samom uvodu, predstavnici Ministarstva su u kratkim crtama predstavili Strategiju upravljanja otpadom na nivou HNK, a nakon toga je uslijedila prezentacija Zahtjeva za izdavanje okolinske dozvole, učestvovali su predstavnici konsultantske kuće. Na poslijetku uslijedila je i kratka prezentacija izabrane tehnologije od strane predstavnika općinskog urbanizma, a koja će biti instalirana u CUO.

Tokom naknadne rasprave, putem prezentiranja ideje o izgradnji CUO, predstavnici općinske vlasti, ministarstva i konsultantske kuće redom su potvrdili da na području Repovačkog potoka (lokacija gdje je planirana izgradnja CUO) neće biti dugotrajnog skladištenja otpada, odnosno formiranja deponije, te da će sav onaj otpad koji preostane nakon procesa razdvajanja biti odvožen na regionalnu deponiju Uborak kod Mostara.

Predstavnici udruženja Zeleni Neretva su u svom izlaganju iznijeli mišljenje i stav udruženja, a od čega se veći dio odnosio na bojazan da bi se izdavanjem okolinske dozvole za CUO praktično izvršila "legalizacija privremene deponije" na ovom području, posebno imajući u vidu činjenicu da je uspostavljanje regionalne deponije Uborak veoma upitno. Kompletno mišljenje Udruženja Zeleni Neretva Konjic o Zahtjevu za izdavanje okolinske dozvole za CUO može se preuzeti na stranici udruženja www.zeleni-neretva.ba.